

Zindagī kī Roṭī



zindagī kī roṭī

Bread of Life

by Bakhtullah

[*Ao, Khud Dekh Lo 13*]

(Urdu—Roman script)

© 2023 www.chashmamedia.org

published and printed by

Good Word, New Delhi

The title cover is a collage of
deeznutz1 <https://pixabay.com/vectors/tortilla-quesadilla-tacos-mexican-8147494/>; Ridderhof
<https://pixabay.com/illustrations/background-grunge-vintage-paper-1774911/>.

Bible quotations are from UGV.

for enquiries or to request more copies:

askandanswer786@gmail.com

Fahrist

Zindagī kī Roṭī Pāo	2
Mujh par Īmān Lāo	4
Maiñ hī Zindagī kī Roṭī Hūñ	6
Najāt Pakkī Hai	10
Khāte-Pīte Raho	11
Pahle Īmān Phir Pahchān	15
Injīl, Yūhannā 6:22-70	17

Ḳhudāwand Īsā mojizoñ kā mālik hai. Ek din us ne pāñch roṭiyāñ aur do machhliyāñ lekar un se 5000 mardoñ ko bāl-bachchoñ samet khānā khilāyā. Log hakkā-bakkā rah gae. Tab wuh ek dūsre se kahne lage, yih to hamārā bādshāh honā chāhie. Agar yih hamāre āge āge chale to ham kyā kuchh nahīñ kar pāenge.

Lekin Īsā Masīh ko siyāsāt se nafrat hai. Aisī bāteñ buland hone lagīñ to us ne apne qarībī shāgirdoñ ko ekdam kashtī meñ biṭhākar jhīl ke pār bhej diyā. Ḳhud wuh akele kisī pahāṛ par chaṛh gayā. Andherā chhā gayā to wuh tūfānī lahroñ par chalte hue shāgirdoñ ke pās āyā. Tab wuh milkar Kafarnahūm chale gae.

Jo log pīchhe rah gae the wuh agle din jāg uṭhe. Apnī āñkhoñ ko mal malkar wuh ustād ko talāsh

karne lage to kahīn na pāe. Kāfī der ke bād patā chalā ki wuh jhīl ke pār Kafarnahūm shahr meñ hai. Tab wuh bhī rawānā hue. Kafarnahūm pahuñchne par unhoñ ne pūchhā, “Ustād, āp kis tarah yahān pahuñch gae?”

► *Īsā Masīh ne kyā jawāb diyā?*

Pahlī bāt,

Zindagī kī Roṭī Pāo

Wuh sīdhe asl bāt par ā gayā. Farmāyā,

Tum mujhe islie nahīn ḍhūṇḍ rahe
ki ilāhī nishān dekhe haiñ balki islie
ki tum ne jī bharkar roṭī khāī hai.
(Yūhannā 6:26)

► *Wuh kyā kahnā chāhtā thā?*

Tum log sirf duniyāwī soch rakhte ho. Mainne tum sab ko khānā khilāyā. Lekin tum ne yih dekhkar rūhānī natījā na nikālā. Tum ne sirf yih natījā nikālā ki is bande ko hamārā bādshāh banānā hai, yahī hamārī duniyāwī zarūriyāt

pūrī kare. Lekin mere mojizon kā maqsad aur hai. Wuh ilāhī nishān haiñ.

► *Nishān kyon?*

Yih zāhir karte haiñ ki Īsā Masīh ko ilāhī iḡhtiyār hai. Ki use āsmān kī bādshāhī lāne kā iḡhtiyār hai. Lekin yih bādshāhī duniyāwī nahīñ hai. Yih rūhānī hai. Yih logoñ ke dilon ko tabdīl karegī. Unheñ aglī duniyā ke lie taiyār karegī. Logoñ ko is rūhānī bādshāhī meñ dāḡhil hone kī koshish karnī chāhie.

Us ne farmāyā,

Aisī ḡhurāk ke lie jidd-o-jahd na karo jo saḡ-gal jātī hai, balki aisī ke lie jo abadī zindagī tak qāym rahtī hai aur jo Ibn-e-Ādam tum ko degā.

(Yūhannā 6:27)

► *Log us roṡī ke lie jidd-o-jahd kyon na karen jo saḡ-gal jāe?*

Ām roṡī khākar insān ko abadī zindagī nahīñ miltī.

► *To phir log kis roṭī ke lie jidd-o-jahd karen?*

Us roṭī ke lie jo abad tak qāym rahtī hai.

► *Kyon?*

Use khākar insān abad tak zindā rahegā.

Lekin yih roṭī sirf ek hī de saktā hai.

► *Wuh kaun?*

Ibn-e-Ādam.

► *Ibn-e-Ādam kaun hai?*

Ibn-e-Ādam Īsā Masīh kā dūsrā nām hai. Dūsrī bāt,

Mujh par Īmān Lāo

Ab log soch-bichār meñ paṛ gae. Ustād ṭhīk hī kah rahe haiñ. Lekin ham kyā karen tāki zindagī kī roṭī pāen? Kyā kām karen jo Ḳhudā ko pasand āe aur hameñ yih roṭī mil jāe?

► *Kisī waqt har insān ke dil meñ yih sawāl ubhar ātā hai ki main kyā karūñ tāki abadī zindagī pāūñ?*

In logoñ ne bhī yih sawāl pūchhā, “Hameñ kyā karnā chāhie tāki Allāh kā matlūbā kām karen?”

Īsā Masīh ne jawāb diyā,

Allāh kā kām yih hai ki tum us par
īmān lāo jise us ne bhejā hai.
(Yūhannā 6:29)

- *Yih kyā kām hai jo dekhkar Ḳhudā hamēñ abadī zindagī kī roṭī degā?*

Īsā Masīh par īmān.

- *Kyā g̃halat kām chhoṛnā kāfī nahīñ? Kyā nek kām kāfī nahīñ? Kyā shariyat par amal karnā kāfī nahīñ?*

Kabhī nahīñ. Ḳhudāwand Īsā farmātā hai ki us par īmān lāo jise Ḳhudā ne bhejā hai. Yānī mujh par. Ek hī wasīlā hai jis se zindagī kī yih roṭī mil jāe: Īsā Masīh par īmān. Abadī roṭī pāne ke lie na nek kām kāfī haiñ na shariyat par amal. Ek hī rāstā hai: Īsā Masīh par īmān.

- *Ḳhudāwand Īsā kyon farmātā hai ki mujh par īmān lāo?*

Wuh jāntā hai ki hamāre nek kām kabhī kāfī nahīñ hoñge.

► *Kyon?*

Hamārī fitrat itnī ḵharāb hai ki hamāre nek kām hameñ Ḵhudā ke sāmne mañzūr nahīn karā sakte. Hamārī fitrat ek galī-sarī machhlī jaisī hai.

► *Kyā pakāne se yih khāne lāyq ho jāegī?*

Kabhī nahīn!

► *Kyā ham ise kisī aur tarīqe se khāne lāyq banā sakte haiñ?*

Kabhī nahīn. Hamārī insānī fitrat hamārī apnī koshishoñ se bahāl nahīn ho saktī. Isī lie al-Masīh is duniyā meñ nāzil huā tāki ḵhud hī hameñ bahāl kare. Isī lie us par īmān lānā zarūrī hai. Kyoñki us par īmān lāne se wuh hameñ yih abadī zindagī de saktā hai. Tīsrī bāt,

Maiñ hī Zindagī kī Roṭī Hūñ

► *Kyā log yih sunkar us par īmān lāe?*

Nahīn. Wuh shak meñ paṛkar kahne lage, “To phir āp kyā ilāhī nishān dikhāenge jise dekhkar ham āp par īmān lāeñ? Āp kyā kām saranjām

deñge? Hamāre bāpdādā ne to registān meñ man khāyā. Chunāñche kalām-e-muqaddas meñ likhā hai ki Mūsā ne unheñ āsmān se roṭī khilāi.”

► *Wuh Īsā Masīh se kyā māñg rahe the?*

Ek ilāhī nishān.

► *Ilāhī nishān kyon?*

Wuh koī mojizā kar dikhāe jo sābit kare ki use ilāhī iḡhtiyār hai.

► *Kyā Ḳhudāwand Īsā ne abhī abhī ek nishān nahīñ dikhāyā thā?*

Zarūr. Us ne 5000 mardoñ ko bāl-bachchoñ samet khānā khilāyā thā.

► *To phir log kyon ilāhī nishān māñg rahe the?*

Yahāñ wuh ek aur bāt māñg rahe the. Islie unhoñ ne kahā ki Mūsā ne hamāre bāpdādā ko man khilāyā. Wuh sīdhe māñg rahe the ki Īsā Masīh bhī āsmān se man barasne de.

► *Man kā yih kyā mojizā thā jo Mūsā ke zamāne meñ huā thā?*

Jab Isrāīlī registān meñ safr kar rahe the to
Ḳhudā ne unheñ man khilāyā thā.

► *Man kyā thā?*

Yih dāne the jo āsmān se girte the aur jo dhaniye
kī mānind safed the. Khāne meñ wuh shahd se
bane cake kī mānind thā (Tauret, Ḳhurūj 16:31).

► *Log Īsā Masīh se is qism kā mojizā māng rahe the.
Kyon?*

Yahūdī riwāyat ke mutābiq al-Masīh kī āmad
par man āsmān se dubārā giregā. Matlab hai,
log chāhte the ki Īsā Masīh man barsākar sābit
kare ki wuh āne wālā Masīh hai.

Īsā Masīh ne jawāb diyā,

Ḳhud Mūsā ne tum ko āsmān se roṭī
nahīñ khilāi balki mere Bāp ne. Wuhī
tum ko āsmān se haqīqī roṭī detā hai.
Kyonki Allāh kī roṭī wuh shaḳhs hai
jo āsmān par se utarkar duniyā ko
zindagī baḳhshtā hai. (Yūhannā 6:32-33)

► *Kyā Mūsā ne man khilāyā thā?*

Nahīn, ẖhudā Bāp ne. Yih pahlī bāt hai. Lekin ab ẖhudā Bāp ek aur qism kī roṭī detā hai.

► *Kis qism kī roṭī?*

Haqīqī roṭī.

► *Man aur is roṭī meñ kyā farq hai?*

Man galne wālī roṭī hai jabki yih roṭī ek shaḅhs hai. Ek shaḅhs jo abadī zindagī baḅhshtā hai.

► *Kaun-sā shaḅhs?*

ẖhudāwand Īsā. Wuhī abadī zindagī kī roṭī hai.

Haqīqī man kā mojizā usī meñ ho chukā hai.

Ab tak sunane wāloñ ko bāt samajh na āī. Unhoñ ne kahā, “ẖhudāwand, hameñ yih roṭī har waqt diyā karen.” Tab Īsā Masīh ne sāf farmāyā,

Main hī zindagī kī roṭī hūñ. Jo mere pās āe use phir kabhī bhūk nahīñ lagegī. Aur jo mujh par imān lāe use phir kabhī pyās nahīñ lagegī.

(Yūhannā 6:35)

Sirf aur sirf ẖhudāwand Īsā zindagī kī roṭī hai. Usī se abadī zindagī miltī hai. Koī aur roṭī yih nahīñ

dilā saktī. Yih hamen ek chauthī bāt kī taraf le jāti hai,

Najāt Pakkī Hai

Yih roṭī khāne se najāt yaqīnī hai, pakkī hai.

- *Kyā āpko yaqīn hai ki āp adālat ke din bacheṅge?*
Koī aur roṭī hamen qiyāmat ke din zindā nahīn karegī. Koī aur roṭī hamen adālat ke din mahfūz nahīn rakhegī. Ḳhudāwand Īsā ne farmāyā,

Jitne bhī Bāp ne mujhe die haiñ wuh mere pās āeṅge aur jo bhī mere pās āegā use main hargiz nikāl na dūṅgā. (Yūhannā 6:37)

Yahān Īsā Masīh ke kirdār kā ek ṭhos pahlū nazar ātā hai.

- *Wuh kyā?*
Charwāhe kā kirdār. Wuh achchhā charwāhā hai jo apnī har bheṛ kī fikr kartā hai. Jis ko bhī Ḳhudā Bāp ne us ke supurd kiyā hai use wuh halāk nahīn hone degā. Kitnī tasallī kī bāt hai. Is ko aur pakkā banākar us ne farmāyā,

Sirf wuh shaḡhs mere pās ā saktā hai jise Bāp ... mere pās khīnch lāyā hai. (Yūhannā 6:44)

Ham apnī hī koshishoñ se najāt nahīn pā sakte. Ḳhudā Bāp Ḳhud hamen khīnch lātā hai. Jab ham Īsā Masīh par īmān lāte haiñ to yahī bāt hamen dilāsā detī hai. Kyoñki yih najāt hamārī kamzor koshishoñ par mabnī nahīn hotī balki Ḳhudā Bāp ke pakke wāde par. Tab hamen pūrī tasallī hai ki ham adālat ke dīn bhī mahfūz raheñge. Pāñchwīn bāt,

Khāte-Pīte Raho

Tab Īsā Masīh ne ek hairatangez bāt farmāī,

Main hī zindagī kī wuh roṭī hūñ jo āsmān se utar āī hai. Jo is roṭī se khāe wuh abad tak zindā rahegā. Aur yih roṭī merā gosht hai jo main duniyā ko zindagī muhaiyā karne kī Ḳhātir pesh karūngā. (Yūhannā 6:51)

Man khāne se Isrāīliyoñ ko abadī zindagī na milī.

► *Kyā abadī zindagī kī yih roṭī bhī isī tarah hai?*

Nahīn. Jo bhī zindagī kī yih naī roṭī khāe use abadī zindagī hāsil hai.

Sāth sāth Īsā Masīh ne ek aur bāt farmāī. Yih ki yih roṭī merā gosht hai.

► *Kyon?*

Jab Isrāīlī registān meñ the to wuh na sirf roṭī balki gosht ke lie bhī tars rahe the (Ḷhurūj 16:3). Aur Ḷhudā ne un kī sunī. Usī shām baṭeron ke ḡhol āe jo pūrī Ḷhaimāgāh par chhā gae. Tab Isrāīliyon ne jī bharkar gosht khāyā. Ab Īsā Masīh farmātā hai ki main zindagī kī roṭī bhī hūñ aur gosht bhī. Man aur gosht ke mojize mujh meñ hue haiñ.

Lekin ab Īsā Masīh ne ek zyādā chaunkā dene wāli bāt kahī,

Merā gosht haqīqī ҡhurāk aur merā ҡhūn haqīqī pīne kī chīz hai. Jo merā gosht khātā aur merā ҡhūn pītā hai wuh mujh meñ qāym rahtā hai aur main us meñ. (Yūhannā 6:55-56)

► *Wuh is se kyā kahnā chāhtā thā?*

Gosht khāne aur ҡhūn pīne kā ҡhyāl to ghinaunā-sā lagtā hai.

► *Ham kis tarah uskā gosht aur ҡhūn khā-pī sakte haiñ?*

Īsā Masīh apnī salībī maut kī taraf ishārā kar rahā thā. Thoṛe dinon ke bād use apnī jān hamārī ҡhātir denī thī yānī use apnā gosht aur ҡhūn qurbān karnā thā.

► *Kyon?*

Use hamāre gunāhoñ kī sazā uṭhānī thī tāki hameñ najāt mil jāe. Aur yih sazā saḳht thī. Sazā-e-maut thī.

► *Lekin gosht khāne aur ҡhūn pīne par itnā zor dene se wuh kyā kahnā chāhtā thā?*

Yih bahut zarūrī hai ki ham har lamhā uskī is qurbānī se abadī zindagī pāte raheñ. Lāzim hai ki ham har lamhā uskī qurbat meñ raheñ, har lamhā us se lipṭe raheñ, har lamhā use takte raheñ, har lamhā uskī bāteñ jazb karte raheñ. Tab yih abadī zindagī hamārī ragon meñ dauṛtī rahegī. Tab ham Īsā Masīh jaise bante jāeñge. Chāhe hamārī zindagī kitnī dukhī kyon na ho hamāre andar uskā sukūn aur uskī tasallī rahegī. Tab uskā nūr hamārī zindagī meñ chamaktī-damaktī rahegī.

Jab bulb meñ bijlī ho to wuh jaltā hai. Bijlī band ho to light nahīñ jaltī. Isī tarah agar hamārī Ḳhudāwand Masīh ke sāth rifāqat āhistā āhistā band ho jāe to ham is bharpūr zindagī se mahrūm rah jāeñge. Tab hamārī zindagī dubārā gunāh se bhar jāegī. Tab hamārā dil andherā ho jāegā.

Ek āḳhirī bāt,

Pahle Īmān Phir Pahchān

Ḳhudāwand Īsā kī yih bāteñ bahut-se logon̄ ko nā-gawār lagīñ.

► *Kyon̄?*

Wuh yih qabūl karne ke lie taiyār nahīn the ki Īsā Masīh zindagī kī roṭī hai. Ki us par īmān lāne se abadī zindagī miltī hai. Ki wuh na sirf ām qism kā gurū hai balki āsmān kī haqīqī roṭī. Wuh roṭī jis se is duniyā aur aglī duniyā meñ bharpūr zindagī mil jāegī.

Ab bahut-se logon̄ ne Īsā Masīh ko chhoṛ diyā. Tab us ne apne qarībī shāgirdon̄ se pūchhā ki kyā tum bhī mujhe chhoṛnā chāhte ho?

Shamāūn Patras ne jawāb diyā,

Ḳhudāwand, ham kis ke pās jāen?
Abadī zindagī kī bāteñ to āp hī ke pās haiñ. Aur ham ne īmān lākar jān liyā hai ki āp Allāh ke quddūs haiñ.

(Yūhannā 6:68-69)

Patras aur dūsre qarībī shāgird ustād kī kaī bāteñ samajh nahīñ sakte the. Lekin baṛī bāt sāf thī: Hamāre āqā ke pās abadī zindagī kī bāteñ haiñ. Wuhī Allāh kā quddūs hai.

► *Ham kis tarah jān sakte haiñ ki Īsā Masīh sachmuch abadī zindagī kī roṭī hai?*

Patras iskā jawāb detā hai. Yih jānane ke lie aql kāfī nahīñ hai. Is ke lie īmān zarūrī hai. Pahle īmān lāo, tab hī jān loge. Ham Ḳhudāwand kā kirdār apnī aql se mālūm nahīñ kar sakte. Pahle īmān zarūrī hai. Tab hī ham jān leñge ki wuh Allāh kā quddūs hai. Ki wuh abadī zindagī kī haqīqī roṭī hai.

► *Ġharz, zindagī kī roṭī ke bāre meñ 6 sachchāiyāñ apnāñī chāhien:*

- Zindagī kī roṭī pāo.
- Mujh par īmān lāo.
- Main hī zindagī kī roṭī hūñ.
- Najāt yaqīnī hai.
- Khāte-pīte raho.

- Pahle īmān phir pahchān.

Injīl, Yūhannā 6:22-70

Hujūm to jhīl ke pār rah gayā thā. Agle din logoñ ko patā chalā ki shāgird ek hī kashtī lekar chale gae haiñ aur ki us waqt Īsā kashtī meñ nahīñ thā. Phir kuchh kashtiyāñ Tibariyās se us maqām ke qarīb pahuñchīñ jahāñ Ḳhudāwand Īsā ne roṭī ke lie shukrguzārī kī duā karke use logoñ ko khilāyā thā. Jab logoñ ne dekhā ki na Īsā aur na us ke shāgird wahāñ haiñ to wuh kashtiyōñ par sawār hokar Īsā ko ḍhūñḍte ḍhūñḍte Kafarnahūm pahuñche.

Jab unhoñ ne use jhīl ke pār pāyā to pūchhā, “Ustād, āp kis tarah yahāñ pahuñch gae?”

Īsā ne jawāb diyā, “Maiñ tum ko sach batātā hūñ, tum mujhe islie nahīñ ḍhūñḍ rahe ki ilāhī nishān dekhe haiñ balki islie ki tum ne jī

bharkar roṭī khāi hai. Aisī ḵhurāk ke lie jidd-o-jahd na karo jo saṛ-gal jāti hai, balki aisī ke lie jo abadī zindagī tak qāym rahtī hai aur jo Ibn-e-Ādam tum ko degā, kyonki Ḵhudā Bāp ne us par apnī tasdīq kī mohr lagāi hai.”

Is par unhoñ ne pūchhā, “Hameñ kyā karnā chāhie tāki Allāh kā matlūbā kām karen?”

Īsā ne jawāb diyā, “Allāh kā kām yih hai ki tum us par īmān lāo jise us ne bhejā hai.”

Unhoñ ne kahā, “To phir āp kyā ilāhī nishān dikhāenge jise dekhkar ham āp par īmān lāen? Āp kyā kām saranjām denge? Hamāre bāpdādā ne to registān meñ man khāyā. Chunānche kalām-e-muqaddas meñ likhā hai ki Mūsā ne unheñ āsmān se roṭī khilāi.”

Īsā ne jawāb diyā, “Maiñ tum ko sach batātā hūñ ki ḵhud Mūsā ne tum ko āsmān se roṭī nahīn khilāi balki mere Bāp ne. Wuhī tum ko āsmān se haqīqī roṭī detā hai. Kyonki Allāh kī

roṭī wuh shaḵhs hai jo āsmān par se utarkar duniyā ko zindagī baḵhshtā hai.”

Unhoñ ne kahā, “Ḷhudāwand, hameñ yih roṭī har waqt diyā karen.”

Jawāb meñ Īsā ne kahā, “Maiñ hī zindagī kī roṭī hūñ. Jo mere pās āe use phir kabhī bhūk nahīn lagegī. Aur jo mujh par īmān lāe use phir kabhī pyās nahīn lagegī. Lekin jis tarah maiñ tum ko batā chukā hūñ, tum ne mujhe dekhā aur phir bhī īmān nahīn lāe. Jitne bhī Bāp ne mujhe die haiñ wuh mere pās āenge aur jo bhī mere pās āegā use maiñ hargiz nikāl na dūngā. Kyoñki maiñ apnī marzī pūrī karne ke lie āsmān se nahīn utrā balki uskī jis ne mujhe bhejā hai. Aur jis ne mujhe bhejā uskī marzī yih hai ki jitne bhī us ne mujhe die haiñ un meñ se maiñ ek ko bhī kho na dūñ balki sab ko qiyāmat ke din murdoñ meñ se phir zindā karūñ. Kyoñki mere Bāp kī marzī yahī hai ki jo bhī Farzand ko dekhkar us par īmān

lāe use abadī zindagī hāsīl ho. Aise shaḡhs ko main qiyāmat ke din murdoñ meñ se phir zindā karūngā.”

Yih sunkar Yahūdī islie buḡbuḡāne lage ki us ne kahā thā, “Main hī wuh roṭī hūñ jo āsmān par se utar āī hai.” Unhoñ ne etarāz kiyā, “Kyā yih Īsā bin Yūsuf nahīñ, jis ke bāp aur māñ se ham wāqif haiñ? Wuh kyonkar kah saktā hai ki ‘Main āsmān se utrā hūñ?’”

Īsā ne jawāb meñ kahā, “Āpas meñ mat buḡbuḡāo. Sirf wuh shaḡhs mere pās ā saktā hai jise Bāp jis ne mujhe bhejā hai mere pās khīnch lāyā hai. Aise shaḡhs ko main qiyāmat ke din murdoñ meñ se phir zindā karūngā. Nabiyoñ ke sahīfoñ meñ likhā hai, ‘Sab Allāh se tālīm pāeñge.’ Jo bhī Allāh kī sunkar us se sīkhtā hai wuh mere pās ā jātā hai. Iskā matlab yih nahīñ ki kisī ne kabhī Bāp ko dekhā. Sirf ek hī ne Bāp ko dekhā hai, wuhī jo Allāh kī taraf se hai. Main tum ko sach batātā hūñ ki

jo īmān rakhtā hai use abadī zindagī hāsīl hai. Zindagī kī roṭī main hūn. Tumhāre bāpdādā registān meñ man khāte rahe, to bhī wuh mar gae. Lekin yahān āsmān se utarne wālī aīsī roṭī hai jise khākar insān nahīn martā. Main hī zindagī kī wuh roṭī hūn jo āsmān se utar āī hai. Jo is roṭī se khāe wuh abad tak zindā rahegā. Aur yih roṭī merā gosht hai jo main duniyā ko zindagī muhaiyā karne kī ḡhātīr pesh karūngā.”

Yahūdī baṛī sargarmī se ek dūsre se bahs karne lage, “Yih ādmī hameñ kis tarah apnā gosht khilā saktā hai?”

Īsā ne un se kahā, “Main tum ko sach batātā hūn ki sirf Ibn-e-Ādam kā gosht khāne aur uskā ḡhūn pīne hī se tum meñ zindagī hogī. Jo merā gosht khāe aur merā ḡhūn pīe abadī zindagī uskī hai aur main use qiyāmat ke din murdoñ meñ se phir zindā karūngā. Kyoñki merā gosht haqīqī ḡhurāk aur merā ḡhūn

haqīqī pīne kī chīz hai. Jo merā gosht khātā aur merā ḵhūn pītā hai wuh mujh meñ qāym rahtā hai aur main us meñ. Main us zindā Bāp kī wajah se zindā hūn jis ne mujhe bhejā. Isī tarah jo mujhe khātā hai wuh merī hī wajah se zindā rahegā. Yahī wuh roṭī hai jo āsmān se utrī hai. Tumhāre bāpdādā man khāne ke bāwujūd mar gae, lekin jo yih roṭī khāegā wuh abad tak zindā rahegā.”

Īsā ne yih bāteñ us waqt kīñ jab wuh Kafarnahūm meñ Yahūdī ibādatḵhāne meñ tālīm de rahā thā.

Yih sunkar us ke bahut-se shāgirdoñ ne kahā, “Yih bāteñ nā-gawār haiñ. Kaun inheñ sun saktā hai!”

Īsā ko mālūm thā ki mere shāgird mere bāre meñ buṛbuṛā rahe haiñ, islie us ne kahā, “Kyā tum ko in bātoñ se ṭhes lagī hai? To phir tum kyā sochoge jab Ibn-e-Ādam ko ūpar jāte dekhoge jahāñ wuh pahle thā? Allāh kā Rūh hī

zindā kartā hai jabki jismānī tāqat kā koī fāyda nahīn hotā. Jo bāteñ mainne tum ko batāī haiñ wuh Rūh aur zindagī haiñ. Lekin tum meñ se kuchh haiñ jo īmān nahīn rakhte.” (Īsā to shurū se hī jāntā thā ki kaun kaun īmān nahīn rakhte aur kaun mujhe dushman ke hawāle karegā.) Phir us ne kahā, “Islie mainne tum ko batāyā ki sirf wuh shaḡhs mere pās ā saktā hai jise Bāp kī taraf se yih taufīq mile.”

Us waqt se us ke bahut-se shāgird ulṭe pāñw phir gae aur āindā ko us ke sāth na chale. Tab Īsā ne bārah shāgirdoñ se pūchhā, “Kyā tum bhī chale jānā chāhte ho?”

Shamāūn Patras ne jawāb diyā, “Ḳhudāwand, ham kis ke pās jāeñ? Abadī zindagī kī bāteñ to āp hī ke pās haiñ. Aur ham ne īmān lākar jān liyā hai ki āp Allāh ke quddūs haiñ.”

Jawāb meñ Īsā ne kahā, “Kyā mainne tum bārah ko nahīn chunā? To bhī tum meñ se ek shaḡhs shaitān hai.” (Wuh Shamāūn Iskariyotī

ke beṭe Yahūdāh kī taraf ishārā kar rahā thā jo
bārah shāgirdoñ meñ se ek thā aur jis ne bād
meñ use dushman ke hawāle kar diyā.)